


誠齋詩集

冊二



楊文節公詩集卷之六

宋吉水楊萬里廷秀甫譔

長陽後學彭淑秋潭甫校訂
繡谷宗裔雲彩四峯甫全校

江湖集

四美堂

義山禾水在處在明月清風無地無光祿子孫寧底巧不應造物獨私渠君不見謝家名子取四字段家作堂兼四美主人自有筆如椽何用殷勤問楊子

秋晚過泉口

日色全無熱秋涼不似初行人驚翡翠掠水度芙蓉平野一回顧遠山千有餘誰令貪眺望却道廢看書

豐山小憩

歸路元無遠行人倦自遲野香寒蝶聚秋色老楓知得得逢清蔭休休憩片時江山豈無意邀我覓新詩

過劉村江

波走痕痕日江呈岸岸秋清流堪數石淺涉不須舟野菊知何喜迎風舞未休
歸途愁欲暮未暮我何愁

寄蕭仲和

貧裏端何好欣然肯卜居詩臞將到骨室陋得關渠我嬾今仍老誰能強著書
談間可無子獨判一秋虛

題劉朝英進齋

燈火三更雨詩書一古琴惟愁脚力軟未必聖門深莫笑雲端樹初如澗底針
不應將一第用破半生心

題王季安主簿佚老堂二首

造物那能惱我曹軟紅塵裏漫徒勞是中却有商量處且道青原幾許高
布襪青鞋已嬾行不如宴坐聽啼鶯只言此老渾無事種竹移花作麼生

和王元駒

向來淮海說三秦脚踏蘇門最絕塵莫道江山歇英氣如今文物有斯人黃埃九陌誰知子青竹千年獨問津未得相看已相識只慙空嘆蜀莊珍

題邱成之司理明遠閣

決曹據按塵似海高閣退食心如冰夜將官本校家本萬山圍裏短檠燈能文未得傲能吏好官不應博丁字何時着脚最高層目送歸鴻揮綠綺

和謝昌國送黃

一作章

俊臣相訪

芒屨爲車不必巾天窮未害子能文謝家有句元無繼枉却催詩頭上雲

歲晚出城

溫飽能消底奔忙自作癡平生脚已繭今日鬢將絲山刻霜餘骨梅橫水底枝只嫌長落寞不道許幽奇

至鷓鴣洞

岸凍樹逾瘦日高林始明瑤草密如積玉泉中暗鳴初至心爲動欲歸脚還停江湖千萬峯穿儂兩鞋青如何鷓鴣嶺咫尺來未曾

讀張忠獻公謚冊感嘆

恩視韓兼趙名均獻與忠禮中非不極勳外若爲同三聖無多學千年僅一翁
猶憐公議在拚淚乞秋風

寄張欽夫二首

作郡纔佳政留中卽好音還將著書手拈出正君心
嶽麓風霜飽修門雨露深
登庸何恨晚廊廟要山林

工瑟曾緣利鳴琴豈負予髮于貧裏白詩亦病來疎知己俱霄漢孤蹤且簿書
三年知免矣一飽會歸歟

和張慶長懷麻陽昌英叔二首

舊雪纔追送新梅又作繁欣逢上林鴈聊免管城冠酒債多多在詩盟久久寒
忽思十年事有枕不能安

自幼仍投老相懽不解愁政緣湖外別負却竹林秋佳政真餘事聞人說甚休
不應野水渡橫此濟川舟

送羅永年歸永豐

補註永年名椿號就齋誠齋高弟

誰道三年聚能勝一別多歲寒知子可心折奈吾何所喜如椽筆能揮却日戈
老夫留病眼看子中文科

夜坐小集

霜餘雪後夜無風人在燈前梅影中玉作寒蔬冰作酒詩人猶自怨天窮

和謝昌國送管相士韵

半世緣癡自作勞萬人爭處我方逃憐渠識盡公卿得一馬歸來骨轉高

郭漢卿母挽詩

婦節今安仰斯人古有光鷄鳴不知雨薺茂獨凌霜未拜金花誥空悲玉樹郎
藤輿簾蹙繡無復出萱堂

庚寅正月送羅季周遊學禾川

眼邊相識蠶樣密如子歲寒萬纔一我往西山子義山老裏一別堪三年外舅
陰功不知數諸孫大半廊廟具學文先要學忍飢明年看子刺天飛

過秀溪長句

去年來此上巳日今年重來未寒食臨溪照影老自羞慙愧春光尙相識秀溪何許好春容最是溪深樹密中海棠開盡却成白桃花欲落翻深紅

題薦福寺

千山底裏着樓臺半夜松風萬壑哀曉起巡簷看題壁雨聲一片隔林來

晚過黃洲鋪二絕

數峯殘日紫將銷一片新秧綠未交道是今年春水小漲痕也到岸花梢僕夫已倦路猶賒脚底殊勞眼底佳綠錦堆中半團雪千楓擁出一桐花

過白沙渡得長句呈胡澹菴先生

收紅拾紫消幾許也費一春強半雨不辭長江萬波阻來聽先生夜深語尙憶向來侍樽俎微雪斜飛小梅吐先生半酣染霜兔金章玉句空萬古今年寒食還相聚明年寒食知何處只道先生押班去不道門生折腰苦

長句寄周舍人子充

省齋先生太高寒肯將好詩博好官又告君王覓閑散要讀短檠三萬卷周家
新畫瑞霧圖渠莫錯認何關渠青原兩公復雙起山川出雲不在此自憐無地
寄病身四海知己非無人老窮只是詩自娛春色撩人又成句

題峽江譚溫父詠齋

漁郎載我下峽水夜尋故人有譚子柴門竹屋斷崖底良齋手題詠齋字巴邱
花草一番新玉筍峯頭月半輪如今正是莫春者三嘆春風舞雪下

殘夏獨行奉新縣圃

我來官下未多時梅已黃深李綠肥只怪南風吹紫雪不知屋角棟花飛

晚登清心閣望雨

憫雨喜見雲喜雲愁不雨長風將怒點慰此樓中暮喜雨不但人松竹亦鼓舞
未知今年熟得似去年否

登清心閣

苦遭好月喚登樓脚力雖慵不自由上得金梯一回首冰輪已過樹梢頭

立秋後一日雨天欲暮小立問月亭偶題

雨後林中別樣涼
意行幽徑不知長
風蟬幸自無心事
強爲閑人報夕陽

七月十二日夜登清心閣醉吟

小樓秋夜月明底
仰不見天惟見水
岸巾獨立四無人
白月青天伴楊子
誰知橫玉作秋聲
一聲吹盡九陌塵
月輪半仄吾未睡
樓角風生涼殺人

月夜散策縣圃有飛蝶仍聞笛聲

月明未許人早睡
笛聲解與秋爭清
夜深不應有飛蝶
渠儂似欲伴人行

中秋後一夕登清心閣二首

昨夜雲爲祟
今宵月始妍
如何一日隔
便減半分圓
影裏偏宜竹
光中不剩天
客來休遣去
我醉正無眠

秋夜真成畫
西山却在東
吹高半輪月
正賴一襟風
清景今年過
何人此興同
青天忽成紙
似欲借詩翁

木犀

天將秋氣蒸寒馥月借金波滴小黃不會溪堂老居士更談桂子是天香

送客既歸晚登清心閣

誰不知儂嬾其如送客何葉聲和雨細山色上樓多出處俱爲累昇沉儘聽他
疎鐘暮相答也解說愁麼

戲嘲金燈花上皂蝶

花鬚爲飯露爲漿黑霧玄霜剪薄裳飛繞金燈來又去不知能有幾多香

劉世臣先生挽詞

策第仍爲邑于公未足論眼中無佛國戶外卽韓門道大功非細人亡德則存
西風寄雙淚吹到秀峯原

羅元通挽詩

奏賦曾三北興能竟二南如何雙桂子枉着拜親衫舊事餘詩酒何人續笑談
生前孝友在伐石爲公鑑

羅价卿母李氏挽詩

孝豈天無報慈如古所稱百年得偕老二子看同升未拜鸞迴紙先虛繡盛藤
他時賴考叔清淚落君羹

過西山

一年兩踏西山路西山笑人應解語胸中百斛朱墨塵雨捲珠簾無半句殷勤
買酒謝西山慚愧山光開我顏鬢絲渾爲催科白塵埃滿胸獨遑惜

豫章江臯二首

幸自輕陰好片秋如何餘熱未全休大江欲近風先冷平野無邊草亦愁
只今秋稼滿江郊猶記春船掠屋茅可是北風寒入骨荻花爭作向南梢

同李簿養直登秋屏

大範今無寺秋屏故有基看山非不好弔古却成悲行役真何苦同來也未遲
題詩只惡語差勝不題詩

送別吳帥

我公四海不數人小煩江西作好春落霞秋水只似舊如何入筆事事新卽今

諸公方袞袞一老不應閑裏頓政緣山水太殷勤日夜叫闥乞此身二天去人
忽覺遠兩地起公端不免蒼生未要怨東山未必東山當此怨

歸自豫章復過西山

一眼蒼花十里明忽疑九月雪中行我行莫笑無騶從自有西山管送迎

送何主簿歸豐城

庚寅之旱奉新爲甚大帥龔公擇行田之官婺女何季華以府檄來不
怵不疑竟以實聞縣令楊萬里哦五言以餞其歸

衆裏非無士難中却幾人如何新帥澤偏作此邦春未要棲鸞恨方看報主身
青燈一樽酒聊復話酸辛

詔追供職學省曉發鳴山駟

數店疎仍密千峯整復斜冰痕猶帶浪霜草自成花錄錄堪朝列星星已鬢華
帝城萬事好得似早還家

望見靈山

旱後催科惱殺儂且隨尺一解而東靈山忽近西山遠回首新吳一夢中

登烏石寺

回頭身忽在樹杪一覽千山萬山小怪崖下落欹欲摧令人仰看怯眼開小亭解事知儂倦翼然飛出青山半上頭最上却鏡平百畝金碧千衲僧高峯高寺更高閣進步竿頭若爲脚茲遊勝絕庸非天山下虛行二十年

夜宿楊溪曉起見雪

茅簷無聲風不起誤喜夜來雨應止開門送眼忽心驚失却前山萬堆翠江南只說浙西山更令着雪與人看諸峯盡處一峯出凜然玉立最高寒溪聲細伴吟聲苦客心冷趁波心去掉頭得句恐人嗔且喚征夫問前路

辛卯五月送邱宗卿太傅出守秀州二首

馮翊端誰可邱遲肯去麼繭絲臣敢後饑饉帝云何身遠當難免能稱未要多但無田里嘆不必袴襦歌

老矣渠憐我超然我愛渠論詩春雨夜解手藕花初夢只江湖去情知伎倆疎

未應五馬貴不寄一行書

代錢塘宰莫子章賀皇太子生辰

寒外乾坤淨霜前殿閣新如何震一索頓有月重輪
甲觀堂初畫青宮榜更銀三天同日曉一氣入荒春
東序繙周學南陽摘漢親承祧英類祖問寢孝通神
帝子臨京邑藩寮着野人天將重九節瑞應誕彌辰
萸菊雙爲壽山河總効珍前星環紫極長照漆園椿

題呂子明國論退菴

筆硯工爲祟湖山苦約盟坐忘非聖處行樂且吾生
一笑誰當會孤斟句恰成何時却乘興雪外扣柴荆

送蜀士張之源二子維燾中童子科西歸

岷山玉樣清岷水眼樣明風流文采故應爾又見張家雙驥子
小兒八歲骨未成誦書新作鸞鶴聲大兒十二氣已老覓句談經人
絕倒豫章七年人得知駃騠三日世便奇天生異材能幾許更飽風霜也未遲

壬辰別頭胡元伯丞公折雙梅見贈作一絕以謝之

一花怪結雙青子獨蒂還藏兩玉花
薄相春工寧底巧眼明初見雪枝斜

四月初二日進士唱名萬里以省試官待罪廬遇林謙之說詩夜歸又見林東因紀其事

清曉朝帝所就列復少須不逢林夫子于何得故吾宮雲霧猶未宸風爽亦初說詩憐新體信美古則無將無古人拙未必今製疎夜歸辱良訊送似談笑餘病懷翻不樂此意從誰舒短歌紀幽事老矣復焉如

送黃仲秉少卿知瀘州二首

灔澦方如象艤艚底似飛相將刺天去收拾大名歸西掖桐陰靜瀘南荔子肥未應經世具便欲閉山扉

補外公何幸求歸我尙留還爲萬里別又費半生愁安得軟黃帽相從却白頭醉中有話在欲說忘來休

晚立西湖惠照寺石橋上

船于鏡面入煙叢寺在湖心更柳中暮色欲來吾欲去其如南北兩高峯

謁永祐陵歸途遊龍瑞宮觀禹穴

我昔騎鳳超九疑今復御風登會稽禹穴下窺正深黑地老天荒知是非
高處偏薄霧秋熱苦時恰輕雨回頭却望昭陵松雲氣成龍或成虎

寄馬會叔

影轉郎官宿春隨刺史天相從忽相別同舍況同年吾愛吳兒說兄如邵父然
賜金真浪費喚取從甘泉

送傅安道郎中將漕七閩二首

一代風騷將百年忠義家出關稱使者踏雪度梅花夢破南宮被春生北斗槎
懸知入奏日不待貢新茶

把酒春如許論詩夜未央相逢便金石何必試冰霜離合知難免愁思自不忘
他年一茅屋公肯訪荒涼

故恭人劉氏挽詞

徐通仲母

